

痛史
第一種

福王登極實錄附

過江七事
金陵紀略

國
史
卷
二

王登極實錄

通江文庫
全覽

辛亥年十月初版



校訂者兼
印行者

商務印書館

印刷所

上海北河南路北首寶山路
商務印書館

總發行所

上海四馬路中市
商務印書館

(痛史福王登極實錄附過江七事)
(第一種)
(每冊定價壹角伍分)
(金陵紀略)

痛史序

慨自烈皇殉國。軸覆樞翻。闖逆攻都。海飛山走。痛東遷之聚散。萍水三朝。覽南渡之興亡。鶯花一笑。值中邦之多難。來外族之憑陵。揚州慘史。周餘有垂盡之傷。江上孤城。父老皆登陴而哭。等衣冠於塗炭。易桑梓爲龍荒。二百六十餘年以來。談者猶覺動容。聞者不無餘痛。何怪當年西臺慟哭。人戀故主之恩。南燼再然。羣奉前王之統。匹夫烈婦。蹈鼎鑊而如飴。義士盡臣。奮干戈而不屈者乎。而天方授楚。謀用不臧。刼後遺民。或黃冠淪隱。結月泉汾上之盟。或石室吟哦。纂踏海嶺天之錄。其志彌苦。其思也哀。今尋溫睿明逸史之所引。與楊鳳苞秋室之所記。綜其目錄。奚翅數百。而禁網久錮。散逸太半。山巔水涯。轉輾匿存。僅得之於

賦塵殘蠹。鈔胥魯魚之中者。能不寶若洪疇。珍逾壁簡也。此類之有彙刻。荆駝逸史導其前。明季稗史踵其後。然未盡者實多。茲向收藏之家。冥心搜訪。得若干種。悉先民匿井之心史。亦人間未見之閤書。若夫鼎革以後。文字之獄。屢有所聞。禁制太甚。牴牾不免。凡此記載。俱甚祕密。今并刊行。俾不泯沫。作者其有憂患。讀者能無不平。顏曰痛史。稱其實也。辛亥十月。樂天居士。

福王登極實錄

吳縣文震亨撰

恭聞監國自福邸至淮也。南都文武大臣及科道諸臣。方集議擁立之事。僉謂以親以賢以序。卽當推奉爲臣民主。操臣誠意伯劉孔昭。督臣馬士英。各傳諭所部將士。以代來中興之意。將士聞命感泣。亦願奉爲六軍主。建義旗討賊。諸臣恭謁陵廟。告非常大變。慟哭。乃告奉監國之議。議協。參贊機務兵部尙書史可法至浦口。具啓。迎駕於淮安。禮部司務官齎南都百官公啓。迎駕於儀真。渡江。泊燕子磯。百官郊迎。命以王禮見。監國素袍角帶。對百官慟哭。百官行禮。手掖之。尋賜茶。言及宗社震驚。大行異變。復哭失聲。因流涕言封疆大計。惟仗諸先生主持。至迎立決不敢當。蓋播遷以來。國母尙無消息。故不携宮眷一人。始意欲擇浙東僻地暫居。以便迎奉。今值國難至此。迎立之事。何忍言。睿音琅然。而睿容具日月表。百官瞻覲。咸舉額謂宗社之

福。

次日爲五月朔戊子。從水西門啓駕。由城外至孝陵。乘馬導引官。請從東門御路入。監國遜避。從西門至饗殿。祭告禮畢。卽向懿文太子陵園駐瞻良久。從朝陽門入。至東華門。步行過殿陛。行謁奉先殿禮。出西華門。暫以內守備府爲行宮。百官進見。行四拜禮。傳令旨召諸臣入議事。

兵部尙書史可法。魏國公徐弘基。靈璧侯湯國祚。各有奏。國祚以戶部靳餉。奏對微激。署禮部兵部侍郎呂大器。謂非對君體。止之。

京畿道御史祁彪佳。因奏綱紀法度。爲國之本。吏科李沾合諸科道奏。以朝班宜肅。蓋時舊京朝儀久廢也。彪佳又奏早頒大號敬天法祖諸事。監國皆虛懷納之。

朝畢。羣臣退議登極監國次第。咸謂仰窺睿意。必欲發喪誓師。曉然示天下以討賊大義。而後正位。宜先上監國璽綬。而後勸進。乃卽範金鑄監國寶。以次日入朝。大臣仍面奏勸進。監國復辭。諭諸臣謂人生忠孝爲本。今大讐未報。孤不能事君。先王殉

節。國母播越。孤不能事親。無遽登大寶之禮。且聞東宮與永定二王。尙在賊中。或可致之。又桂惠瑞三王。皆叔父行。惟諸先生擇賢迎立。言訖淚俱。大臣及言官再奏。求允所請。監國遜謝如前。署禮部臣大器。率百官跪奏勸進第一箋。傳旨暫領監國。百官退。踰時。又進第二箋。命傳進手書批答。仍允監國。餘所請不允。

又次日。傳旨。官止服青錦繡朝拜。仍行王禮。不必穿帶朝服。百官以典禮重大。具朝服入。監國親行告天禮。陞座。百官四拜。魏國公弘基率百官跪進監國符寶。受訖。再行四拜禮。乃退。諸臣尙有言宜卽登大位以鎮人心者。御史彪佳。謂令旨先受監國之請。其名極正。賢德益彰。旣可以示謙讓。海內聞之。皆知監國無因以得位之心。俟發喪擇吉。登大寶。布告天下爲當。禮臣魏國皆然其議。議乃定。卽用右都御史張愼言爲吏部尙書。傳旨會推閣員。疏上。先用兵部尙書可法進東閣大學士。兼兵部尙書如故。戶部尙書高弘圖。改禮部尙書。進東閣大學士。俱卽入閣辦事。而召工部侍郎周堪賡爲戶部尙書。鳳督士英進東閣大學士。兼兵部尙書都察院右都御史。總

督鳳陽等處如故。而以前會推疏詞林。僅推掌翰林院詹事府詹事姜曰廣一人。傳旨吏部。予察祖制。閣員俱用詞林。至先帝間用別衙門官。今正推如何止列姜先生一人。似與祖制不符。着該部再行添推來看。吏部會九卿再具疏。仍以曰廣居首。而推禮部尙書王鐸。禮部右侍郎陳子壯。詹事府少詹事黃道周。右春坊右庶子徐汧。令旨再點用首次二員。俱進東閣大學士。兼禮部尙書入閣辦事。諸臣以次待用。六卿九列既備官。復催補科道各員。皆一時人望。尋特遣彪佳頒赦諭江南云。

是舉也。羣臣當攀號憤變之後。天柱地維。摧陷頃刻矣。值真主纘運。日月重光。實惟二祖列宗在天式憑以有此。海內聞當陽在卽。用人行政。動協人情。未有朝端已見清甯。而醜類不授首膏鉞者。刻口口復神京。寸磔逆賊。雖在草莽。胥忍死拭目俟之。若諸臣思祖宗三百年德澤在人。大行十七載焦勞求治。洗滌肺腸。以事新主。掃除門戶。以修職業。何事不可辦。何罪不可討。亦何功名不可就哉。

聞法駕入都之日。都人聚觀呼萬歲。見兩大星夾日而行。鍾山紫氣中五色雲見。而

先是龍江浮梗楠巨木千章。若爲鼎新大內而出者。兩都並建。聿還舊觀。江北諸大帥。皆上表勸進。所傳遼東總兵吳三桂。疾馳至山海。結虜入關。大殺賊十數萬。奪其輜重無算。邊鎮諸宿將。無不投袂奮劍。以報國仇者。中興大業。豈靈武草次靖康偏安之足比哉。

此處文字模糊，難以辨識。依稀可見「...中興大業...」等字樣。

過江七事

宜興陳貞慧著

計迎立

闖賊之變。邸報斷絕。民間頗有流傳。中外大震。金陵羣亡賴。挾饑軍思逞。洶甚。勳紳富室。重足立矣。大司馬史可法。將有勤王之行。諸言路屬宮詹曰。廣止之。且內顧根本。曰。廣力折之。愆愆趣嚴計守禦。卽發。越日集議。部分兵各門。仍責成巡城御史督察。而郭維經則中城行柵。以維經官金陵久。素得民故也。其護陵防江。則守備太監韓贊周同魏國公徐弘基誠意伯劉孔昭咸加蒞焉。韓璫復布諸璫。特嚴門禁。蒐選卒騎五千。屬銳司徒盡擐甲秣馬。飭壘居中地而陣。厲士奮口口防不測也。粵東解餉金適至。計部尙書高弘圖立取以給饑軍。軍亦戢。於是奸人憚不敢動矣。久之。魏國約卿貳言路集其家。招入密室。邊遽在焉。先帝果鼎成也。乃咸大痛。北拜稽顙。

而號哭盡哀。按淚出。約冠服。姑如常。禁訛言者。殺亡赦。先是。諸臣耳語亦微及迎立事矣。僉推屬主兵者。江南北諸紳。則羣起擁潞王。曰。廣曰。神宗皇帝聖子神孫。濟濟具在也。四十八載之深仁。何負於天下。而輕持其座。別與圖功耶。恐天下有起而議其後者矣。可法聞而是之。曰。此兵端也。惟分定可以已之。說在獲免矣。疑有訛脫曰。廣曰。雖然。今日之事。守猶創也。可輔則輔之。口實在福。子其圖之。可法曰。以齊桓之伯也。聽管仲則治。聽易牙開方則亂。今吾輩之所立者。豈其不惟是聽。而又何患焉。擁潞者聞之。大譁。以詢諸紳。又頗於福推惡。可法於是引避不言矣。江干之餞。弘圖私謂曰。廣曰。渠卽不爲他人言。亦可不爲公言耶。曰。廣叩之急。乃曰。福桂兩題也。前與鳳督商之。鳳督者。馬士英也。及晤士英圖計。以親以賢。惟桂乃可。議既定。士英欲自以爲功。卽約諸臣晤於江浦。規布腹心。曰。廣不往。諸卿貳亦不往。語詳曰。廣辨鎮將疏中。往受語者。科臣李沾。臺臣郭維經也。歸而布之。鳳督定迎桂矣。越日。可法亦以手書曉諸臣。迎桂者何。以福惠之有遺議也。乃舍而立桂也。其潞藩則倣古兵馬元帥。

之制。暫借統兵馬。見者咸唯唯。曰。廣援筆答之曰。親賢兩盡。理也。事則書生弗敢與知。但桂藩遠在天末。諸藩邇集淮陽。恐奸人居奇。卒有黃袍加身之事。且太阿輕授。或至假是弄而眞且成。則是重貽先恨也。而吾輩他日死。亦何面目見神宗皇帝於天上乎。衆讀之。亦唯唯。時南中咸知主兵者定議。已擬儀郎戒乘輿。法物往粵矣。及士英歸鳳。則聞諸將高杰黃得功劉良佐畢集。大駭。訶之。乃知守備大璫盧九德合盟。亦有所擁立。而所立者福也。士英度勢之成也。無敢支吾。遂隱其前說。且乞埒盟。於是士英稱定策矣。盧璫者。幼常給使恭皇帝。宮號胎裏紅者也。其首宣力以此故。而可法概未知之也。復書與士英。訟言福不宜立。多指斥語。士英得之。乃大喜。由此以挾可法也。於是揆席中樞。惟其所欲得矣。已卽貽書南中曰。吾已奉福藩。主三軍也。士英自是定策儼然矣。衆集韓璫宅。是日。見其書者。初咸錯愕。久之。亦復唯唯。韓璫見諸臣無言。乃呼前置几。徐布筆。執簿而請曰。諸公旣無遺議。請北拜押名。衆起趣拜。曰。廣曰。不可。夫爲天下立君。而若是之草草。非所以光昭令典也。是舉也。高皇

帝在天之靈。其實式憑之。盍出而大號焉。明晨祭告。然後行事。衆曰諾。而阮大鍼刺得曰廣語。遂文致以不畫花押傳邸報矣。士英聞之。則又大喜。以爲是役也。吾卽自以爲功。恨碌碌耳。幸可法以異議書與我。今日廣又不畫押。此兩人者。世所指名人也。又相善。此真可坐以異黨。而發明吾之勞苦功高矣。乃屬大鍼等浸流惡語。冀以聳動福藩。及福王入宮。士英馳啟云。聞南中有臣。尙持異議。臣謹勒兵五萬。駐劄江干。以備非常。志危險也。自是士英定策。功漸隆高矣。自士英之賣可法也。可法失勢。憫墨而已。而攻史附馬者。亦遂出祭告之舉。諸臣畢集。內官監未成行。而魏國大有言矣。弘基之言曰。史君可殺也。勤王無功。何以返爲。曰廣憤然曰。若夫握兵而不勤王者。又應生也乎哉。夫旣忍死以圖興復。而乃爾長城之俾壞乎。夫低節首公。知兵急病。史眞其人。若之何甘心之。昔史公受知先帝也。爾曹頂奉天人不啻焉。權寄稍移。下石隨起。此賈豎之行也。竊爲世臣羞之。語畢。大呼高祖在天實聞斯語。時曰廣情詞慷慨。鬚髯盡張。勳臣俱面相覷無言。而給事中李沾之咆哮忽起。衆咸驚怪之。

沾則攘袂大呼。今日尙不立福王耶。吾撞死於此。掖御史陳良弼佐之。劉孔昭亦作索劍狀曰。大家死。大家死。曰。廣呼語之曰。爾輩何爲者。吾爲羣塚史公發憤耳。若夫迎立。昨已定矣。序實應也。兵以臨之。勢成分定。其孰敢推遷以自干戮辱。此何爲者。甚矣其淡也。旁觀者皆相視微嘻。及出。乃知是日福邸有人刺候。沾等詗知爲此也。自是李沾亦儼然定策矣。韓璫出趣祭告文曰。廣撰。呂大器書。吏白文辦。咸詣奉先殿。祭告如常儀。痛哭久之。乃起押名而退。弘圖出。指曰。廣手曰。史乎史乎。危殺之矣。不圖忠肅之事。再見今日。大器曰。將爲救死。便圖居功。人之無恥如是。亡何。福王舟至矣。可法尾焉。諸臣次第入見。通名畢。訴以國難家難之頻仍也。哀痛不自勝。諸臣亦泣。旋請監國。王曰。宗社事重。不穀不佞。不足以稱宗社。願請討宜者。不穀不敢當。羣臣皆伏固請。王謙讓者再。曰。廣曰。以親以賢。無如殿下。但願他日無忘今日之難耳。王曰。且曉所言。諸先生旣謬推不穀。且不敢辭。退而弘圖曰。廣詢於可法。議何而二。可法咄咄。張目吐舌而已。蓋不敢斥言士英之賣己也。越日。諸臣奉法駕入宮。憇

於寺。坐方定。而可法同李沾陳良弼至矣。遽掙曰。廣。跪而盟曰。所不與同心者。神其殛之。曰。廣愕然起而問故。可法曰。二三言路。言公尙懷二也。曰。廣曰。怪哉。此輩又定策一功矣。及可法入直。曰。廣復以前事問之。曰。立今上者。亦子之初心也。因而成之。不亦善乎。曰。貴陽不與也。詆極口焉。且曰。渠守洛陽之所目也。曰。廣曰。渠今定策矣。可法笑。居久之。士英至。曰。廣亦問之。曰。頗憶前事乎。江浦之晤。言猶在耳。史公亦告爾故圖矣。其書猶在余所也。士英面赤。曰。立桂。史意也。予曰。亦佳。但須速耳。曰。廣乃大笑。曰。果然立桂。子共主之矣。今日之事。如深相批引。水落石出。首功者不歸然一盧瑯乎。士英默然。一日酒酣。曰。廣調之曰。向讀子疏。詞氣壯烈。董卓入洛陽時語。何以加焉。惜哉。大才而小用之也。殺一措大而用兵五萬也。蓋士英謀所以居功者甚懽。以故陰折之。乃曰。廣則語人曰。是亦有功焉。微貴陽。事盡出諸將。不光。而士英故闇大體。至沾沾時自伐。皇帝非我不立也。曰。廣曰。此非子所宜言。士英勃然曰。何謂也。曰。天子惟天所授。非人力也。如可立也。亦可廢也。輕朝廷矣。且上序實應爾。天也。